

Minister Otmar Oduber a reuni cu Stichting Gruponan di Carnaval



ORANJESTAD

-- Diaranson Minister Otmar Oduber a reuni cu e Stichting Gruponan di Carnaval riba nan peticion caminda nan a trece nan preocupacionnan relaciona cu e desaroyonan cu ta tumando den Carnaval. Vocero di e fundacion, Kevin

van Ommeren a indica cu e preocupacion di e gruponan di Carnaval ta mas tanto cu tin falta di comunicacion entre e organizacion madre, SAC, cu e gruponan di Carnaval y esaki a wordo presenta na Minister. Tambe el a expresa cu nan a puntra

Minister Oduber riba e futuro di Carnaval di Aruba mirando cu hopi di e gruponan di Carnaval ta core e riesgo cu nan no lo sigui cu nan participacion den Carnaval mas mirando e structura di financiamento y busca sponsor. A mostra Minister igual-

mente cu nan no tin ningun informacion riba e acuerdo cu ATA a firma cu SAC pa loke ta trata e yudansa adicional cu e gruponan por haya pa nan participacion na diferente evento di Carnaval.

Mirando esaki tin gruponan cu a cay afo pa bin ma remarca pa haya e extra ayudo aki debi cu nan no a participa na por ehempel Prins cu Pancho. Otro preocupacion cu a wordo presenta na Minister ta cu tin gruponan cu a cay atras den cantidad di participante den parada di flambeau y tambe cu ta tuma decisionnan den Carnaval manera cambia ruta sin cu e gruponan haya sa. Kevin van Ommeren a duna di conoce cu un preocupacion adicional cu nan tin ta con ta bay sigui pa futuro mirando cu ta net 10 grupo tin y cu den e ultimo 10 añanan e unico grupo cu a bin adicional ta esun di Kevin James NBO cu Royal y e aña aki a bin Meta Social Club tambe, y van Ommeren ta spera cu nan sigui den futuro tambe.

Opinion di e vocero di Stichting Gruponan di Carnaval ta cu si e structura di financiamento no cambia, gruponan por sigui cay afo cu tur consecuencia pa Carnaval. "Esey nos no kier, nos kier pa gruponan keda uni, pa mas gruponan lanta, pa mas grupo participa den Carnaval y sigui aporta na e actividad grandi aki". Kevin van Ommeren a finalisa bisando cu durante e reunion a yega na e decision cu Minister Oduber lo sinta un biaha mas cu e fundacion y splica nan kico ta bay pasa cu SAC, lo presenta e statuto-nan di nan fundacion y tambe lo muestra con ta e milho maneranan cu Cultura lo por aporta tambe na Carnaval den futuro. Minister Otmar Oduber a scucha e preocupacionnan presenta pa Stichting Gruponan di Carnaval y a conseha nan pa sinta cu SAC directamente y discuti cu nan e preocupacionnan aki como tambe e diferente sugerencianan cu nan tin pa asina sigui engrandecede nos Carnaval. □